



KREANDO PROSPERIDAT DOR DI KONEKTÁ OPORTUNIDATNAN DI INVERSHON KU INVERSHONISTANAN

SKINA DI INVERSHONISTA

Publikashon 12. 2017

Kiko tin den un akshon?

Parti 1

“Di kon no invertí bo aktivanan den e kompanianan ku bo realmente gusta?

Manera Mae West a bisa, “Dimas di algu bon por ta fantástiko”

Warren Buffet

Akshonnan Shernan. Kapital propio. Terminologia ku ta sirkulá den e sekshon di ekonomia di media, pero bo sa hopi realmente tokante esakinan? Bo sa ku nan ta relatá na e bolsa di balor, i ku nan ta konektá na kompanianan, o, i tambe ku nan ta òf por ta basta riesgá. Wel, ta algu asina nan ta.

Pero warda un ratu! Tin mas. Kompañá mi den eksplorashon di e partinan fundamental pa bo no tin nodi di ta wak ku un kara bobo ora e sekshon di ekonomia di notisia kuminsá.

Kiko ta e diferencia entre akshon i sher? Tin un diferencia? ... Si, tin. Pero wanta un ratu, e diferencia no ta masha importante, i ta masha aseptabel, ku ta usa akshon i sher interkambiabelmente den e mundu di invershon! Esensialmente, akshonnan òf shernan ta trata di slaisnan chikitu di un kompania ku bo por poseé, loke ta duna bo derechonan òf un claim riba un pida di e ganashinan i aktivanan di e kompania.

Kualke aktivo ku ta permití bo di tin derechonan di propiedat, ta un tipo di invershon di kapital propio. Pues, kumpra un akshon òf sher ta un invershon di kapital propio ku ta otorgá bo derechonan di propiedat den e kompania – na e grado di e kantidat di akshon/sher ku bo ta poseé kompará ku e kantidat total “disponibel di shernan emití”. Pues mas akshon bo kumpra mas grandi bo slais di e kompania. Por ehèmpel, si un kompania tin 1000 sher emití i abo ta doño di 100 unidat di e shernan ei, lo bo poseé i tin un claim riba 10% di e kompania su aktivonan neto, alternativamente konosí komo su balor den buki. Ora bo ta poseé akshonnan bo ta wòrdu kualifiká komo un akshonista.

Tin dos tipo prinsipal di akshon, akshonnan komun i akshonnan preferente. Ora bo ta un akshonista komun bo tin derecho di risibí dividendo (sènnan pagá for di e ganashinan òf reservanan finansiero di e kompania na su doñonan) i e derecho di vota den reunionnan di akshonista, sea en persona òf pa medio di un poder si bo no por ta presente. Di otro banda, akshonista preferente normalmente no por vota den reunionnan, pero nan ta haña trato preferensial – manera e nòmber ta sugerí - kompará ku e akshonista komun, loke ta nifiká ku nan tin un derecho preferensial riba e ganashinan di e kompania i aktivonan neto/balor den buki. Por ehèmpel, si un kompania disidí di paga un dividendo na su doñonan, e akshonistanan preferente lo wòrdu pagá promé. Importante ta, si e kompania bati bankrut i e aktivonan neto wòrdu bendí i e entradanan mester wòrdu pagá na e doñonan, e akshonistanan preferente lo wòrdu pagá nan sènnan promé ku e akshonistanan komun.

E pregunta e ora ei ta “di kon bira un akshonista komun?” E kontesta ta, pasobra e claim ku un akshonista preferente tin ta fiho, normalmente nan ta wòrdu pagá un porsentahe fiho ku ta wòrdu akordá ora ta kumpra e sher preferente. Pues ni maske kuantu ganashi e kompania hasi, e claim di e akshonista preferente ta restringí. Sin embargo, esaki no ta e kaso ku akshonista komun. No tin límite riba nan claim, pues mas e kompania gana, mas tantu e akshonista komun ta gana. Esensialmente, si e akshonista komun ta karga tur e riesgo di wòrdu pagá último, e ora ei nan mester wòrdu rekompensá dor di haña claimnan sin límite riba e ganashinan, korekto? Ta primariamente pa e motibu aki, ku akshonnan komun ta wòrdu konsiderá mas riesgá kompará ku otro aktivonan, manera bono. Pues, ta importante, ora bo kumpra un akshon, ku bo ta kumprando den un kompania basá riba kriterionan ophetivo i ku bo ta sigur ku e tin bon perspektiva pa kresementu fuerte i tiki chèn di kibra.

Kompañá nos pa e próksimo publikashon unda nos lo kompartí algun tep pa hasi negoshi ku akshon.

Sigui Skina di Invershonista pa tur kos ku bo mester sa tokante Kreashon di Rikesa!

E editorial aki ta wòrdu presentá na bo pa e DCSX ku kolaborashon di Vertex Investments . Outor di e publikashon aki: Stephanie Shaw CFA, MBA.

